



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 8

**Venezuela Tir Nicolas Maduro-i
sepai million aika shimtsü**

**Alcaraz aser Swiatek nati
Cincinnati Open kokogo**



VOL. XXII ISSUE NO. 306 (ADOK 306)

DIMAPUR

RASEMNÜ (WEDNESDAY)

LUROI (AUGUST) 20, 2025

₹ 5.00

Sorkar telangzüba nung temulung masür: 5 Tribes CoRRP

Dimapur, Luroi/August 19 (TYO): Reservation Review Commission nung züngsem asütsü atema CSO nungi mendenpur masü saka pei kin tenüng nung nübu tejangja agüjang ta Nagaland Chief Secretary-i jangjashitsüba nung mepelar, ta August 19, 2025 nü 5 Tribes Committee on Review of Reservation Policy (5 Tribes CoRRP) sangdong ka ajanga ashi.

Yashi State Cabinet senden amenba nung lemtetbaji ibai asünungbo, ibai kin pongu sanger tangatetba indang-indanga mezüngmeshiba lir, kechiaser

onoki mezünyong Commission nung mendenpur-a süang mesüra parnoki shimba nübu süang, CSOs khenyongi medendaktsütsü akhang, ta ashi.

Onok August 9 pangzüng nung nokdaka lir, koba State sorkar nem kasaji agüja lir. Onoki takhangba agüja aliba magütsütsü aser menudaktsütsü merangba melen State sorkar nungi telangzüba tajung imlar. Kasa mapang tarutsü nung totuyuba ka magütsü tashi State sorkar sentong aser senden kecha nunga onoki shilem magi atatsü, ta 5 Tribes CoRRP ajangasa ashi.

Pimla nung nisung tepsetba asoshi ZYO-i longkak ait tenzükogo

Dimapur, Luroi/August 19 (TYO): Peren district kübok Mhaikam aser Pimla village tsüngta tetsür tasü mang ka April 7, 2025 nü ngutetba dak sendakba nung ochi obendang khanga Zeliangrong Youth Organization (ZYO) ajanga Mongulbarnü phase tanabuba longkak ait tenzükogo.

Iba longkak aitba sentong ya Zeliangrong Students

Union, Zeliangrong Mipui Organization aser Western Naga Youth Front indang federating units tem lungjemer ayongzük.

ZYO tir R. John Zeliang-i lokti den jembidang, ochi obendang magütsü tashi maneni longkak aittsü ta ashi.

Ibai Zeliang tsürtem atema kisüng masü saka Naga nunger ajunga asoshir rarar, ta pai ashi.

Osangbeneri nüngdakba reprangtsütsü mulunga lir: Advisor Imkong L Imchen

Dimapur, Luroi/August 19 (TYO): Advisor, Information and Public Relations, Imkong L Imchen-i August 19, 2025 nü Secretariat, Kohima nung pa indang office chamber nung Kohima Press Club (KPC) Executive Council aser züngsem taintem den sensaksemba senden ka ayongzüka mena liasü.

State Assembly mapang mesüra danga sentong nung osangbener tem shilem tajungba nung agitsü aser facilities agütsütsü atema Imchen-i KPC lenirtem dang tangatetba asüngdanga liasü.

Iba sentong nung KPC ajanga state nung osangbener tem inyakyim tajungba akumtsü aser ajangzüksü asoshi proposals balala lemsatepa liasü.

Advisor dangi shiti ka züluba nung KPC ajanga kanga nüngdaka aliba Nagaland Working Journalists' Pension Scheme mapa kuma inyaksü asoshi tim ketdangsür den jembitsü ayongzüka liasü.

Journalism ya profession ka ama kumer astünung, Nagaland nung osangbener asoshi pension scheme ka tenzükba ajanga parnok mapa nungi anisüngzükbä sülena senotsü teyari anutsü aser parnoki lokti nung tongtipang shilem agiba tepela temaitsü mera tongtipang ka asütsü, ta KPC ajanga ashi.

Kidanger states Assam, Manipur, Arunachal Pradesh, Meghalaya, Mizoram tem densema

India nung state timba nung Pension Schemes for Journalists ya tenzüka mapa kuma amshitar, kong osangbener tem iba scheme nungi teyari angur, ta Kohima Press Club-i ashi.

Iba atema proposal ka state sorkar nem agüja lir, ta iba senden nung dena alir Commissioner & Secretary IPR Orenthung Lotha aser IPR Director Dzüvinuo Theünuo nati ashi.

KPC ajangasa Accredited Journalists nem operational subsidies agütsüba ya küm asem mesüra talila nung khen temloksünung ajungtsü, kechiaser iba teyari timba kumtsüba ajanga osangabener teyari tali angutsü aser parnok inyaksangshia tajungba ajumtsü, ta ashi.

Tawa Mokokchung Press Club ajanga 'professional journalism' aser 'unregulated media content' tsüngta nüburtem tali mangmangtepba tebilemstü lemsatepba athishia KPC-ia tangatetba kasa nung lir ta ashi.

Social media contents tali akumba ajanga nüburtemi osang agiba nung tali mangmangdaktsür, aser kuli tejangja maka osang prokshiba yagi akhi mapang nungi amshiba aser temulung lemteta aliba osangtem asoshi timtem agütsür aser osang bendenba nung dangar dang alia inyakba osangbener mapa nunga kongshitsü, ta KPC ajanga ashi.

Bendanger nem Naga nunger tarutsü tia melemtetdaksütsü: NSF



Naga Students' Federation (NSF) ajanga Mongulbarnü longkak aitba mapang tangokba noksa nung angur. (Kohima, Aug. 19, 2025)

Kohima, Luroi/August 19 (TYO): NEET 2025 nung Nagaland Quota kübok state medical seat atema Vatsala Phangal nem menden agütsüba anema Naga Students' Federation (NSF) ajanga Mongulbarnü longkak aita liasü.

Iba sentong nung jembidang, Nagaland nung lisopur nem wazüka yutsüba menden asoshi lisopur masür candidate kati apply asüba angazüka kanga tezü atanger, ta NSF tir Medovi Rhi-i ashi.

State nem MBBS menden 42 lenzüksüba ya Nagaland meyong aser bendangeri Naga nunger temeden aser tarutsü tia bener maotsüla, ta pai ashi.

"Ibai asen temeden lir, aser bendangeri asen tarutsü tia nung telemtetba magitetsü. Anungji NSF den nübur ajungai nokdaktsüla," ta Rhi-i ashi.

Tawa agiba NEET tatidang nung Vatsala-i All India Rank 455 aser Category-III kübok State

Rank 1 ngutet.

Federation ya nisung kar dak tenük yokerba masü saka Naga nunger kaketshir temeden asoshi nokdaker, ta pai jangjatsü.

"Tebu tang posting mechi candidate yagi address ya Kohima agütsü, ajisüaka la ya Haryana state nungi lir. La ya Nagaland lisopur masü aser state nung tejangja kin kata nungia masü," ta ashi.

Army officer kati par jala candidature asoshi raraba ya tesüngmangtsüka lir, ta Rhi-i ashi.

"Nisung ka kijai asen Naga nunger tarutsü jenjang nung telemtetba magitetsü," ta pai ashi.

NSF-i iba candidature anema maneni nokdaktsü aser Technical Education Department nungi admission forms memeshidaktsütsü, ta metetdaksü.

July 28 nü Gauhati High Court, Kohima Bench ajanga NEET-UG 2025 Nagaland State Quota asoshi counseling nung Phangal shilem

agidaktsütsü aser petition nung tatembang obendang magütsü tashi medical menden ka tazüng yutsütsü ketdangsür nem tutuyuba agüja lir.

Technical Education Department-i Phangal indang application magizük aser la ya Scheduled Tribe candidate ka masü aser Naga nunger lisopura masü ta shia lir.

State medical quota menden ya Nagaland nung lisopur asoshi kisüng wazüka yuja lir.

Ajisüaka Phangal tebui (Army officer) anir lar kinunger temi la indang application magizükba anema court nung ken o benoka la Nagaland nung azüing aser state code kübok tatidang agütsü, anungji la state quota agitsü temsüa lir ta nokdaker.

Mongulbarnü Principal Bench of the Gauhati High Court ajanga Kohima Bench indang interim order ya soit aser candidate-i mepishiba ama hopta lir iba ken o jembitsü lemteta lir.

MP S. Supongmeren Jamir-i district ajunga atema NABARD meshir

Dimapur, Luroi/August 19 (TYO): Nagaland nungi Member of Parliament (Lok Sabha) S Supongmeren Jamir-i Centre dang state nung aliba district ajunga nung National Bank for Agriculture and Rural Development (NABARD) ajanga peria awajemtsü ayongzüka liasü.

Paisa Assam nung Mariani railway station nungi Assam nung Tuli railway station tashi BG Express (train No. 15665) aotsü

mapangtalangka nungi khanga aliba lephsia liasü, ta Mongulbarnü Nagaland Pradesh Congress Committee sangdong ka ajanga ashi.

Assam aser Arunachal Pradesh nungbo parnok indang NABARD inyakyim ulushia aor, saka Nagaland nungbo tesem tuluba mawajemi lir, ta MP S. Supongmeren Jamir-i tuteta ashi.

State nung district 17 aliba nungi NABARD indang Dimapur regional office ajanga district

pongu dang awajemer, kong staff 15 shi lira ser staff teyariteper maka assistant general manager anati district pezü ketdang asür, ta pai ashi.

"Iba yongji district 12 nung NABARD establishments shidak mali yutsür," ta pai ashi aser Union Finance Minister Nirmala Sitharaman dang nüngdakba staff tem shimtsü aser Nagaland nung district ajunga NABARD agi awajemtsü ajungshia liasü.

MPC-i yimdong nung noksa tangoka jajaba sentong ayongzük

Mokokchung, 19th Aug (TYO): World Photography Day 2025 nüngtem nung Mokokchung Photography Club-i Mokokchung nung yimdong süa noksa tangoka jajaba (street photography) sentong ka "ni sapuba noksa" omen dak rangloker Aug 19 nü ayongzüka mungogo.

Iba sentong nung MPC züngsemtem adenshia Mokokchung town tesem balala, lenmang nung nisungtem olioraba, mapa balala inyakba aser temeket metatem noksa

tangokyonga senzü.

Iba sentong ya tongtibangsa photography ya mapang intoktsü (hobby) mesüra mapa (profession) ka dangbo masü, saka iba yagi pei sobaliba wazüka ayuba den ajungmesoba aser noksa ajanga otsü tapu balala yanglutetba oshi ka lir.

MPC tongti zülur, Moa Among Pongeni jembidang, World Photography Day amungba ajanga amatoktsü aliba mapang alangzükbä den lanur noksa tangoktsü jangrartem iba mapa jangrabangra aser khuret

benangazüksü ajungshitsü maongka tulu lir, ta ashi. Yimdong nung noksa tangoka jajaba ajanga külem züngsemtem den shisa lemsateptsü maongka angur, kadi ka angazükteper aser oliorartem dena sensaksemteter, ta paisa shisem.

Iba ama sentong ayongba ajanga noksa tangoktsü yimyatsüya balala angazükba den lanur sempet aketertem pei sempet arangshitsü aser temaba jenjangi ajungkettsü asoshi ibai maongka tulu lir, ta MPC züngsem Jonathan-i lemsatep.

MULUNG NEN O



ngugogo. Nenok temeim aser teyaritep mapa tajungtem teti onok mulungjang nung alitsü. Nenok ajak dang onoki kangasa pelar.

~ Temeim Kinungsü, jabasotem aser Kinungertem.

Ozü temeim kinungbo aser tsürabur tajung **Wb. Talitemsu Amri** mapang tatsüka shiranga alidang aser pa August 12, 2025 nü iba lima nungi pila orr onok mangyim jashi nung alidang, shirnokisa onok dang meima yaritepogo, nenok ajak dang onoki kanga pelar. Nenok sarasadem aser temeim teyaritep mapatem ajanga onok taküm nung Tsüngrem taochi kanga jangjaa metetogo. Asen Kibuba Yisu Khristai nangzükba teti tatem makaba taküm nung onok mulung anisüngzük anguba mapang, Mathi 5:4 nung, 'Shirnoki mang ayimer parnok temoatsüba, kechiaser parnok süneptsütsü,' ta ashiba tenangzükba o bilemteter. Onok mangyim jashi nung alidang, nenoki onok den yaritepba temeim mapatem nungi onok tashi aser tesünep tulu

Viswema nung Financial & Digital Literacy Camp agi

Dimapur, Luroi/August 19 (TYO): NABARD-i achaayangba Financial Inclusion Fund (FIF) kübok Financial and Digital Literacy Camp ka Viswema yimtsüng nung August 19 nü agiogo.

PMSBY, PMJJB, APY, aser PMJDY amala social security scheme tem aser banking system tem indang tangazükba agütsütsü nükjindong nung iba sentong ya State Bank of India (SBI), Kohima branch-i ayongzükba agia liasü.

Iba sentong ya SDO (C) Jakhama, Vineikho Tetso lenisüba nung agi aser pai lokti pela agizükba o jembia liasü. O jembiba mapang pai, formal banking service tem agitsü atema jenjang tajungba kümdaktsütsü aser senotsü dak sendakba nung osang tejangja agir telemtetba agitsü atema

yimdak yimtsüng nung alirtem nem senotsü achaayangba dak sendakba nung tangazükba agütsütsü koda tongtibang iba indang lemsatep.

Sentong nung SBI Kohima Assistant Branch Manager Anthony K. Nguori-i financial literacy initiative indang nükjindong metetdaksü aser ashiba agi, iba sentong ya account lapokba inyakyim, KYC compliance aser account tem nung member nomination koda tongtibang ibala amala banking indang inyakyimtem sentong nung shilem agirtem nem metetdaksütsü nükjindong nung ayongzükogo.

Kasa mapang nung LBO Kohima, Lead District Manager (LDM) Temsummeren-i, Pradhan Mantri Suraksha Bima Yojana (PMSBY), Pradhan Mantri Jeevan Jyoti

Bima Yojana (PMJJB), Atal Pension Yojana (APY), aser Pradhan Mantri Jan Dhan Yojana (PMJDY) amala sorkari senotsü teyari agütsüba Social Security Scheme tem indang metetdaksü.

Paisa, item scheme tem atema temsüa alirtem, tajangzük aser scheme shia nung züngoksemba yimya metetdakja liasü.

Maneni SLBC Chief Manager, H. Lalhlipui aser RBI Assistant General Manager K. Samuel Liangousiam nata iba camp nung dena liasü.

Camp nung Viswema yimtsüng nung alirtemi shilem agi aser parnoki banking aser insurance service tem dak sendakba nung ken o mangatetbatem shisalen sayurtem dang asüngdanga jangjashiogo.

MCTE nung tasenpur aniokba sentong agi



August 19, 2025 nü Mokokchung College of Teacher Education nung 14buba session pur aniokba sentong agir kelen sentong nung adener telok tangokba noksa angur.

Mokokchung, Luroi/August 19 (TYO): Mokokchung College of Teacher Education nung tanü 14th session pur aniokba sentong agiogo.

Iba sentong Sayangpong Pongen ajanga ketdangsüa tenzük aser Tsüngrem temoatsü jazüka Yashimongla ajanga sarasadem aser tasen arurtem pela-a agizüka

ajungshitepba o Neimou ajanga jembia liasü.

First Semester Student Teachers pur tenüng nung Lentilong Jamir-i seniors-tem aser tesayurtemi parnok meraketa tetushi agüja agizükba asoshi tepelaba lemsatep.

Dr. K. Rijinkhum Yimchunger, Assistant Professor, MCTE ajanga

tajungshi o jembia aser tasen 14th session pur parnok kija shia pei sasa pei metetpelaba mapang agi aser P. Tumong Khiamniungan ajanga sarasadem mezüngbuba sentong tembanga liasü.

Ano tanabuba sentong nung 3rd Semesters ajanga shilem balala agia kanga dang longsotepa agi.

Minister Metsubo Jamir & Speaker Sharingain Longkumer dang pelar: MTLT

Dimapur, Luroi/August 19 (TYO): Minister, Rural Development & SIRD, Government of Nagaland, Metsubo Jamir-i anibelem arema 27 Mokokchung Town Assembly Constituency nungi lanur 100 nem tesem balala nung mapa agütsütsü asoshi meranga inyakba atema pelaba lemsatep, ta Mokokchung Town Lanur Telongjem (MTLT) sangdong ka ajanga ashi.

Honda's Corporate Social Responsibility mission den teka amteper Japan, Dubai aser danga 'global hospitality hubs' nung mapa angutsü tejangja nung world class training, hospitality skilling agütsüba ajanga lanur nem tashi agütsütsü aser State alema oa mapa ngua inyakba nung yaritsü ta amanger, ta ashi.

Kasa mapang Nagaland Legislative Assembly nung Speaker, Sharingain Longkumer-i Mokokchung jila

yangertsü asoshi maparen balala inyakba atema kangasa pelaba lemsatep, ta MTLT ajanga ashi.

District Planning & Development Board, Mokokchung indang Chairman ama NLA Speaker-i 'Iconic Project of LADP 2024-25' kübok - 'Mapang Tongshi' Clock Tower, Cold Storage facility aser Natural Banana Fiber Production Unit amenokba maparen animesor inyak.

Projects asemprong mapang tatsüka nung takok ngua renemer August 14, 2025 nü semzükogo, koba ajanga pa dak lenisüba yimya tajung aliba aser nübür tenzüktsü temulungtetba aliba sayur.

Ozü lenir tarutsü anogotem nung maneni moajang ta sarasademtsür aser maneni nübür ajangzüktsü asoshi terenlok tali bener arutsü imlaa atar, ta MTLT sangdong ajangasa ashi.

K Tokugha Sukhalu-i committee senden thinener

Dimapur, Luroi/August 19 (TYO): Committee on Urban Local Bodies & Nagaland Village Councils Advisor aser mendenbuba K Tokugha Sukhalu-i sangdong ka ajanga, committee senden August 19 nü agitsü aliba August 21 nüi thinenba metetdaksüogo.

Iba senden ya anepdang 11 ako nungi tenzükba Assembly Secretariat, Kohima, C. Chongshen Committee Room nung amentsü.

Committee züngsem ajak dang iba senden nung adentsü atema mapang agütsütsü mepeshia metetdaksüogo.

Dimapur Ao Lanur Telongjemi tenüngsang agütsü

Dimapur, Luroi/August 19 (TYO): Dimapur Ao Lanur Telongjemi sangdong ka ajanga, taoba Commissioner of Police Dimapur, Kevithüto Sophie IPS nem, pa IGP jenjangi ajungketba atema aser Ministry of Home Affairs, Government of India-i pa mapa tajung asoshi medal agütsüba asoshi tenüngsang agütsüogo.

Iba tetushi agütsüba ajanga pai bendanga agüja inyakba, pa professionalism aser Commissioner of Police, Dimapur ama inyakba mapang pai pa mapang kanga junga inyakba kuli agütsür.

Lokti tentet ka ama rule of law ajungketba aser police dak nübürtemi tamang katetdaksütsü atema longjemer inyakba bilemteter. Pa indang tenure mapang longjemer inyakba den mapa ajak jetjeta inyakogo aser tetsükdaksütem ajak kokteta ogo, aser iba ya teti bilemtettsü. Pa mapa nung temaba jenjangi

atuba aser India sorkar nungi tetushi anguba ajak ya pai langa aliba ajanga aser ajak atema nemadangtsüka lir, ta kasa sangdong ajanga metetdaksü.

Kasa mapang nung DAYO-i Commissioner of Police tasenba Aotula Imchen IPS pelashishia agizükogo, shiba kasa dang mapa tajet, meranga inyakba ketdangsür aser tenendak police officer ka lir. Dimapur yimjung nung toktsütsü aser lisopurtem atema talitsü tesem tajungba ka kümdaktsütsü atema la aser police force den longjemer inyaktsü yongya atar.

Maneni DAYO-i, law enforcement agencies tem maneni nongtita yaritsü aser temzüng özüng akümtsüba aser ajak nem ochi obendang agütsüba tebandang maliba aser tekümsükba kübok aliba lokti ka yangertsü atema teyari agütsütsü tenangzükba agütsüogo.

Committee on Government Assurances senden ayonger


Dimapur, Luroi/August 19 (TYO): MLA aser Committee on Government Assurances mendenbuba P. Longon-i, Committee on Government Assurances and Oral Evidence indang Internal Working Rules (1st Amendment) 2025 indang Introductory, Adoption senden ka Public Health Engineering Department, Environment Forest & Climate Change

Department aser Geology & Mining Department nungi ketdangsürtem den amentsü ayongzükogo.

Iba senden ya August 28 nü 11 ako nungi tenzükba C. Chongshen Committee Room nung amentsü

Committee on Government Assurances züngsem ajak dang iba senden nung tamakok maludaktsüi arua adentsü mepeshia metetdaksüogo.

NDA senden nung CP Radhakrishnan nem tetushi agütsü



August 19, 2025 nü New Delhi nung NDA Parliamentary Party senden nung Ato kilonser, Narendra Modi-i Maharashtra Governor aser NDA nungi tatong Tir candidate, C.P. Radhakrishnan nem tetushi agütsüdang tangokba noksa nung angur. Kasa noksa nung Defence Minister Rajnath Singh, Union Home Minister Amit Shah aser BJP National Tir, J.P. Nadda nungera angur.

New Delhi, Luroi/August 19 (Agencies): Mongolbarnü New Delhi nung NDA Parliamentary Party senden nung Ato kilonser, Narendra Modi-i tatong Tir election nung tokteptsü atema NDA-i shimba candidate- Maharashtra Governor, CP Radhakrishnan nem tetushi agütsü.

CP Radhakrishnan ya 1957 küm October 20 nü Tamil Nadu kübok Tiruppur nung aso. Pa tainlonglong asüba mapang

nungi Rashtriya Swayamsevak Sangh (RSS) nung aden aser BJP nung dena Coimbatore Lok Sabha menden nungi anaben takok ngua liasü.

Pa 2004 küm nungi 2007 küm tashi Tamil Nadu BJP Tir inyaka liasü.

Radhakrishnan ya tang Maharashtra Governor teinyakdak. Yaküm July 31 ita nung pai Governor mapa agizüka liasü. Iba jakdang pa Jharkhand nunga February 2023

nungi July 2024 tashi Governor inyaka liasü.

2026 küm Tamil Nadu nung assembly elections agitsü lia linük tatong Tir election nung tokteptsü atema NDA-i pa shim. Pa tatong Tir akümba ajanga south India nung NDA tashi itshtisü nükjidong nung pa candidate shimogo.

Linük tatong Tir election ya September 9 nü agitsü aser kasa anogo nungsa vote zünga election agiba osang sangdongtsü.

Online Gaming Bill kübok online ajanga sen asayaba ajak nokdangtsü

New Delhi, August 19 (Agencies): Union Cabinet-i Online Gaming Bill agizükogo; iba bill ya online ajanga sen asayaba tapu ajak nokdangtsü atema lir.

Kodang iba Bill ya agizüka ozüng kümdir online ajanga games asayaa sen 'transact' asüba ajak nokdangtsü, ta osang ka ajanga metetdaksü.

Regulation & Promotion of Online Gaming Act kübok, online ajanga sen asayaba games atema sen transfer asütsü asoshi banks aser financial institutions nem temelaba magütsütsü.

Iba Bill kübok sen asayaba games indang advertisement-a ajak nokdangtsü.

Iba bill ya Bodhbarnü Lok Sabha nung benoktsüa akok.

2023 küm October ita nung sorkari item ama platforms nung GST shilem 28 agiba mapang nungi sorkari online ajanga asayaba games mita arudar. FY25 nungi online games nung takok angurtem dang saru shilem 30 agir aser bendanglen gaming operators danga India-i saru agir.

2023 küm December ita

nungi Bharatiya Nyaya Sanhita kübok ozüng tasen ka benoka an-tokdangba ya ozüng alema inyakba mapa ka kümtsüogo, aser iba ozüng kübok aibelenertem küm tenet tashi tepuokdak ayutsü aser senchi aika achitsü.

"An-tokdangba aser sen asayaba" ya linük temzüng kübok State List nung lir, aser Centre sorkari 2022 küm nungi 2025 küm February ita tashi nung online ajanga an-tokdangba mesüra sen asayaba websites aser apps

Maharashtra nung tzünglu dak sendakba lendong nung nisung 6 asü

Mumbai, August 19 (Agencies): Tesüiba anogo ana tsüngda Maharashtra nung tzünglu sashia aruba mapang lendong balala nung nisung trok süogo aser nisung noklang aika jenshiogo.

Maharashtra kübok district aika nung tzü metsüngogo, lenmang aika raksaogo aser alu nung aonsotsü jenti raksatsüogo, ta Mongolbarnü ketdangsertemi metetdaksü.

State disaster management department den senden amenba sülen state Chief Minister Devendra Fadnavis-i, taruba ghonda 48 ji Mumbai, Thane, Raigad, Ratnagiri aser Sindhudurg district tem atema kanga tongtimbang asütsü, ta metetdaksü.

Ketdangsertemi iba tensa mita repringdar aser kanga nemzüka aliba tesemtem nung alir noklang aika aienshidaksüogo, ta disaster management control room-i metetdaksü.

Tesüiba anogo ana tsüngda tzünglu dak sendakba lendong balala nung nisung trok süogo aser Nanded district nung nisung 290 kümzüko. Tzümetsüng aliba tesemtem nung State Disaster Response Force

(SDRF) aser Army yoka lir. India Meteorological Department (IMD)-i maneni taruba ghonda 48 tashi Mumbai densema central Maharashtra tesem aika nung tzünglu arutsü, ta metetdaksüogo.

Osangbenertem den jembidang Deputy Chief Minister Ajit Pawar-i, tzünglu maneni aruba agi state nung aluyimba lu ali hectares lakh 10 jungnüa tzü agi metsüngbangogo; kodang tzü aremdir alu nung takoksa asadangtsü, ta metetdaksü.

Hombar nikongdang nungi tenzüka Gadchiroli nunga tzünglu maneni aruba agi tesem aika tzü agi metsüngbangogo.

Perlkota ayong nung tzü tali metsüngba ajanga Bhamragad taluka kübok yim 50 bo tesendaktep lenmang raksaogo aser Bhamraga-Allapalli Highway-a shibangogo.

Tesüiba anogo pezünü tashi Washim district nung tzünglu maneni aruba agi alu nung tzü metsünga ali hectare meyirjang aika nung tsünüba aonsotsü raksatsüogo.

Tzünglu kanga aruba sülen Kolhapur nung Bhogavati ayong nung aliba Radhanagari dam nungi tzü 11,500 cusecs chiok, aser ibaji ajanga Panchganga ayong nung tzü tali metsüngbanga yimdar, ta ketdangsertemi metetdaksü.

Iba dak alia Chandoli Dam nungi tzü chiokba agi Warna ayong nung tzü tali yima Kolhapur kübok aliba yimtsüng aika metsüngbangogo.

Tzümetsüng tensa nung ajemdaker Mongolbarnü school aser college ajak shibangtsü ketdangsertemi tuyua liasü.

IMD-i tzünglu maneni arutsü ta sangdongba sülen kümzüka maparen inyaksü atema SDRF, NDRF aser Army tem tesem balalai yoka lir.

Tatong Tir election atema INDIA teloktepi Sudershan Reddy shim

New Delhi, August 19 (Agencies): Linük tatong Tir election nung toktepdaksütsü atema opposition INDIA teloktepi taoba mapang Supreme Court judge, B. Sudershan Reddy tenüng sangdongogo; Reddy-i NDA candidate C.P. Radhakrishnan den tokteptsü.

Taküm July ita nung Jagdeep Dhankhar-i pa temang mejungi dang aliba kuli nung ajemdaker tatong Tir menden nungi anena liasü.

Mongobarnü INDIA teloktep candidate sangdongba mapang nung Congress Tir, Mallikarjun Kharge-i, Justice Reddy ya India nung kanga takutet



August 19, 2025 nü New Delhi opposition INDIA teloktep senden nung Congress Tir Mallikarjun Kharge, taoba mapang Supreme Court judge B. Sudershan Reddy, NCP-SP Tir Sharad Pawar, TMC MP Derek O'Brien aser DMK MP Kanimozhi Karunanidhi nung noksa nung angur. INDIA teloktep nungi linük tatong Tir candidate ji Reddy asütsü.

judge rongnung ka lir, ta ashi. Pradesh High Court nung judge Paisha, Reddy ya Andhra

inyak aser Gauhati High Court

ning Chief Justice inyakba densema court aika nung

inyakogo aser tesüsa Supreme Court nung judge inyaka liasü, ta metetdaksü.

"Pa ya loktiliba, rongsenkettzüng aser yimtenren tsütsü ochi atema tasü itta inyakba nübo ka. Pai obendang agütsüba balala ajanga pai sensakertem atema bilemstüba aser linük temzüng den temeden balala kümzüksü atema inyakba kuli sayur," ta Kharge-i ashi.

Reddy ya 1946 küm July 8 nü Telangana nung Rangareddy district kübok Akula Mylaram yimdak aso. 1971 küm December 27 nü pa Hyderabad nung advocate ka ama Bar Council of Andhra Pradesh nung dena liasü.



TIR YIMYIM YIMOBILEM (EDITORIAL)

DIMAPUR WEDNESDAY, AUGUST (LUROI) 20, 2025

Dimapur ya shirnoki anepalutsü?

Dimapur yimti yimdong ajanga süidang, Dimapur nung alirtem peisasa nümamedangtetsüsa motzü, lishi aser auyi agi tenük meinpronga süir. Idangji jet ta ya shibai anepalutsüba ser nung anepalu mesüteter, shiba tai aser shiba mapa ta tangar indang dang bilema süir. Aji oda, Dimapur anepalutsü asoshi District administration lir, Dimapur Municipal Council koda ? PWD aser Urban Development department-temia angur asü mangur ? Naga Council Dimapur office kimasa temenenba nung koda ? Nagaland Chief minister, PWD minister aser Urban Development minister-tema khenkhenbo alilen aluagi Dimapur yimti yimdong ajanga süir asü mesüir na (?) ta bilemer. Aji oda, Dimapur nungbo Dimapur yimti anepalutsüsa Citizen Forum kata malia na ? Kechiba Dimapur nung alirtem katia Dimapur nung motzü matsüngtsüsa, lishi malitsüsa aser auyi mapungtsüsa inyaktsü mebilemer aser kechiba meinyaker (?) ta tangar, tangar nem dang tai tonglokja anogo shia Dimapur yimti yimdong janaba ngur temulung mepelai senzür. Ajisüaka, kodang jet ta meyiper Dimapur nung kibur ya shiba ta bilemdangdir, kiburjibo Districy Administration masü, DMC aser Naga Council-a masü, PWD aser Urban Development department nata masü, saka kiburjibo Dimapur nung alir sensosangertem lir, anungji motzü matsüngtsüsa inyaktsübaji kibur mapa, lishi tepdoktsüjia kibur mapa aser yimti yimdong nung anak auyi mali ajem tsüka ngua merüka alitsübajia kibur mapa aser kiburji asenok lir. Aji oda, asenokbo Dimapur nungi yimsüsür akümtsüba mesüra yimten nung menden kabosa mekatsü bilemba shisatsü masü saka Dimapur nungi lishi tepdoktsüba aser anak auyi oktoktsüba mapaji asenok mapa ta bilema asenok dak Dimapur merüka aser topur junga yunüba shisatsü aser tejangraba alitsüla. Ibaji Dimapur nung shitak kibur küma alitsü purtem mapa asütsü tim. Talisa, Tsüngremia asenok Aotsür Aortem nem Dimapur ajungtsü asoshi inyaktsü khuret tuluba agüja lir ta asenoki angatetsüla, kechiyong Dimapur nung kongi odir oaka asenok nütsüng nübo teimba angutsü, tetezüji Tsüngremi asenok nem Dimapur temoatsü tuluba agüja lir ta angatetdi, anungji asenokbo temoatsü dang agir mapabo magitsü masüji, Tsüngremi asenok nem moatsüba lima aser yimti anepalutsübaji asen mapa asütsüla. Kasaji, asenok koba kiyong aser tesem nung lidir liaka asen kimasa tesadamba, temerükba aser tajungba asütsü tim. Tang tashi nung asenok Aortem Dimapur yimti topur ajungtsü asoshi tajung ka inyaktsübaji 2019 küm Ao kaketshirtemi parnok hon jubilee mapang nung PWD lenjem nung Yimkong jajaba lenmang songa noksa tapu balala tepa toktsüba aser Naga Shopping Arcade nung nübortem kazüdak aser tzü tajung ajemdak yanglutsüba mapa asütsü. Iba kasa mapang nung ano Dimapur Langpangkong Senso Telongjemia parnok hon jubilee tenüng nung yimti tiyong nung mapang tongshi ka den tzü tajung ajemdak yanglutsüba mapatem ajanga yimti topur ajungba dang masü saka nübortem anisüngzük anguba angur. Iba denji ano Dimapur nungsa mesüaka, tawa Tsüngremmung tenüng nung Chümoukdema Ao lanurtemi mapa tajung inyaktsüba nguogo. Aji oda, tangarbo inyaktsü bilemyonga nübo maliba agi meinyakteter saka asenok nembo Tsüngremi nübo, rongsen aser mapang ajak moaja lir ser nung, asenoki tangar dak dang ranglokba agi asen meyong yimti merüka topur junga ayutsübaji asen mapaa ta merajemer. Aji oda, Dimapur topur junga asenoka tangar tsüngdang nümadangtetsü aser Dimapur topur mejungra tangar anir Dimapur nung mesenzünütsü. Ano, asenoki bilemdangtsüba mapa kaji, Dimapur nungbo, tangar lima aser yimti amato masü, raliwalirtem asoshi repranga jajatsüba tesem mali, anungji akhidang Kachari chuba Chess asayaba tesem wazüka aliba sayurbo tesayutsü maka lishi aser auyi melanga senzütsüsa adoker. Aji oda, asenokbo Tsüngremi moaja lirji, ibaji zümghia Dimapur nung alir yimtsüng shiai Dimapur nung tesem tilala shiteta anepalu tenzük nungbo, Dimapur nung kibur aser yimsüsürji asenok asütsü. Kasa tangatetba nung Aor lokti tulubai anir mapang mapang shia yim nübodoka Dimapur yimti yimdong aoktsü sentong yanglutsü junger.

OLEMSABANG

FNR-i AYONGZÜKBA NÜKLA TSÜNGREMER SENTONG SÜDAKTSÜNER TA SARASADEMER

~ Imlikokba Imsong, Ungma.

Küm aika tejaklen FNR ya Dr. Wati nungertemi tentetter Naga nunger nüjiso büshirtem ya mezüngbüba nung asenok Naga nüngertem telemsa mekai arok sapang ka kumtetter nükjidongji merangtepti ta ayongba ya ngüa aser angashia arugo, iba asoshi kanga timtem agiasa merangdangba ngugo. Aser shidi süra idangjibo telok 4, 5 shi dang liasü (nüjiso asoshi nokdaker). Saka tanü telok 25 dak tema lir ta angazükdang shibai mesüra koba teloki Nagaland asoshi nüjisoji bener arütsü aser koba nem tagütsüria agütsütsü aser koba telokbo dena alitsü mesüra medeni alitsü ta shisadanger. Au tanübo telok o telok tsüngda arishitepba kasettepbabo mali saka adangji Naga kin asoshi nokdaker süra nükjidongji kati katia pokchi shitepa tangatetep aser taremsük nung lemagji lenchi-i arutepa temtetsü nüpur temibo yimlaseta atar. Aser aji mapa agi matalok nungpo kin asoshi nokdaker asü masü mapa agi nüpurtemi metetsü. Ni-a kinü nungi ano tila tanür mapang liasü, menguaka angazükba aser kaket nüng züngshidang jepera mesüngzüktsüsa kokoa bilemer. Tsürapor mapangji aji oda Naga nunger koma rishikangshi, okrong aser tasüba ajuru. Aser item densa ajakji alima dang sangdongtsü radio, tv aser media kecha agia metongtet, saka item ajakji aremtet. Kechiyong asenok Naga nunger asoshi tim tajemdakdak peria aliyong aji oda arema nokdak. Aser asen Naga nunger rishikangshir tanishir-i anir taochi maketertemji koma Tsüngrem nungi aser adakatem agi tanü tashi temerenshi angur ibaji asenoki temetet dang (asenoki aji aji ta shitetsü). Tamaket nüng kanga timtem aser tokrong tenjiyong ya no ta sür China-a süang, Pakistan (tanü Bangladesh) a süang asenoki teyari meshitepba arubaji tim dang. Kechiyong tekasa agi perangpong aser bomb den merarateptet. Aser socialism ji maitsür. Saka socialism inyakyim tetoyubaji asenoki mapa agi mesayütetter. Kechiyong ajaki meranga inyaktsü, züsentsü tepok sünga chiyongtsü aser linük asoshi koda tejakleni aotsü aser ajongkettsü ta merangdangba mesayutetter. Tsürapor mapa nung yaritsübo toktsür inyaka akaba chimatsü merangertem lanurtem ya anir aruli mapa meranga inyaktsü ajongshili ta alir telok ka danga ali nungbo asen lima ya temelenshiba nüng terenlok lila ta shisadanger. Tang amai azümesen agi sünger chiyongtsübo tajung tang chinur, Gari tajung nung menur oli aruli ta tayimtsü tajung nungi ayazüker aoer amai tang, saka angadi lema agütsüba jang (rice) chiyonger senzür-a aika lir. Tangsa tang joko nenoka nenok sasa lia oang ta sür chiok nung asen sasa inyaktetba aser bener arütetba kechi kar? Shidakba shisadangdi mesüra socialist inyakyim ji jongrara süaka asenok mapa inyaktsü yimya ya tashi ali nungbo shibai mesüra shirnoki azümesener paikati mesütsü? Ta shisadanger. Jang angadi lemtsürji alü ayimer kanga apa-a kümogo. Anungji tema telong ajak nung alirtemi azümesen malitsü aser Yisu dak amangertem (naga nunger ajak amai) tetsükchitep meli-e telongjem ka nung asen lima tejakleni aotsü melongtet mesüra yamaisa lipalirora azümesen ya metoktsü tashibo asenok o asenok na züktepba tepetpba rarateptsü ana nung lir. Katepba poksettepba tabo meshili kechiyong asenoki tang tashi ano bomb-a perangpong-a meyanglüteter. Pei tangerbo missile-a ta aser kechi kechi anüngtom nungi tsükchir den rarateper.

Anungji asen Naga lima ya Tsüngremi memoatsüba limabo masü-ar tang koba senden FNR-i ayonga lir, Naga nunger telok telemsa ajak nüng lenirtem ajak melungjang nung Tsüngremi mapa tajungtiba inyakang ne! Ta nüpurtem ajaki kangzüka sarasademdi.

Amen.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Eritrea nung Arogo lenir 7 chioktsü atema campaign ka agitsü



August 19, 2025: Eritrea linük nung tesüba küm aika tepuokdak puoka aliba Arogo lenir tenet chioktsü atema takhangba agüja alima tesem ajaklen campaign ka agitsü.

Orthodox putir ana küm 21 shi pua ayuba mapang nung tena kinüngtsürtembo süadokogo; Rev. Gebremedhin Gebregiorgis aser Dr. Futsum Gebrenegus na 2004 küm November 19 nü pua liasü, iba sülen Rev. Tekleab Menghisteb-a apu, ajisüaka tai tongloksüba dak alaka tang tashi nungbo parnok shinga maitüsü.

1993 küm nungi Tir, Isaias Afwerki yimsüsüba kübok Eritrean Orthodox Tewahedo Church anema inyak tenzüka liasü.

2004 küm nungi tepuokdak ayuba Khristan lenirtem rongnung parnok asembo Medhane Alem Church nungi lir. Arogo lenir tenetji Asmara nung aliba Wengel Mermera Criminal Investigation Centre nung yua lir.

Eritrea nung tepuokdak tamajungtibaji iba Centre ya lir, ta U.S. Commission for International Religious Freedom (USCIRF)-i metetdaksü.

Dr. Gebrenegus tepuokdak alidang pa kinüngtsü aser tebu naprongla süogo.

Ano Pastor Menghisteb ya Asmara nung aliba St. Mary Psychiatric Hospital nung senior doctor lir. Pa apuba sülen pa kinüngtsü Wubie Kahsay den jala asem Hana, Sesayit aser Rediet nunger tetsübu nung linük toktsür jenogo.

Linük balala nung Khristan temeden atema inyakertem aser Khristan melungtet telok balalai küm 20 dak tali tepuokdak aliba Khristan lenirtemji chioktsü atema inyakdaksüner, ta linüktem dang mepishir.

Parnokisa, August 22 nü 'International Day Commemorating Victims of Acts of Violence Based on Religion or Belief' anogomong nung Eritrea nung Arogo lenirtemji chioktsü atema longkak aitba sentongtem ayongzüka agitsü, yimdong süa jajatsü aser sarasadem sentong ayongzüka agitsü mepishia metetdaksü.

Iba dak sendakba osangtsüsangji Voice for Justice Facebook page nung tejangja angutsü, ta parnoki metetdaksü.

21 Wilberforce, Set my People Free aser Christian Freedom International teloktemi August 21 nü Washington D.C nung aliba Eritrean Embassy kima sentong ka ayongzüka agitsü. August 22 anogoji embassy sodi anogo lir, ibayongji parnoki anogo ka jila iba sentong agitsü. Anüngdang 11:00 ako nungi tenzüka parnoki Dupont Circle Fountain nungi embassy tashi oa sarasademtsü aser Arogo lenir tenetji chioktsü atema takhangba agütsütsü.

August 21 anogo nungjisa Christian Solidarity Worldwide-ia London nung Eritrean Embassy kima longkak aittsü aser Brazil MAIS-ia online ajanga sarasadem sentong ka

ayongzüka agitsü.

August 22 anogo nung HMK Switzerland (Hilfe für Mensch und Kirche)-ia Geneva nung Eritrean embassy kima longkak aittsü, National Christian Evangelical Alliance of Sri Lanka-i Colombo nung online ajanga sarasadem sentong ka agitsü, Nigeria nung CSW Nigeria aser Texas nung Freedom Seekers International-ia sarasadem sentong ayongzüka agitsü.

Open Doors-i France, Italy, Denmark, Canada aser Sweden linüktem nung campaign ayongzüka agitsü; Sweden nung Set My People Free, Voice of the Martyrs Canada aser Voice of the Martyrs Poland, International Christian Response (ICR)-i United States nung sentong balala ayongzüka agitsü.

Maryland nung ICE-i apuba pastor Fuentes Espinal chiokkogo



August 19, 2025: July ita tatemlen Maryland nung federal immigration ketdangsertemi apuba pastor ka chiokkogo.

Maryland kübok Easton jila nung aliba Iglesia del Nazareno Jesus Te Ama Arogo nung pastor, Daniel Fuentes Espinal-i, pa hopta asem tepuokdak aliba mapang nung sensotsü aser sarasadem agi nungita yarirtem ajak dang pelaba metetdaksü.

"Ni tepuokdak aliba mapang nung nenoki lenmang balala ajanga yariba atema pelar. Nenoki sarasademtsüba atema pelar. Tsüngremi atangji nenok sarasadem langzüogo," ta

arrshi küm 54 pastor, Espinal-i metetdaksü.

Par jala Clarissa Fuentes Diaz-ia video ka ajanga Maryland Governor Wes Moore aser U.S. Congress züngsemtem dang pelaba lemsatop.

"Kübu kidangi meyipa aruba atema ni kanga pelar. Pa ya kibong nung tongshi lir. Pa meyipa aruba atema ni kanga pelar," ta lai metetdaksü.

U.S. Immigration & Customs Enforcement (ICE)-i July 21 nü pastor Fuentes Espinal pua liasü. ICE agent temi, pa ita trok visa bener America-i aru saka tesüba küm 24 tashi pa US nung alir ta shia

ANOGO ABEN TSÜNGREM DEN

Arogo Tasü - Ezekiel 37: 1-14

"Item teret taküm alitsü kokdi ma?" (Ezk. 37:3)

Ainkar Ezekeil dang Tsüngremer nübur atsüngzüka aoba mangdang ka sayu. Teret takong lenden ka sayu. Teret takong jagi parnok tia sayu. Parnok meyipa marutettsüba jenjang tashi orr liasü. Nüburtemi parnok sasa ayimten, "Onok teimla samaogo!" (t.11). Tsüngremi ainkar dang asüngdang, "Item terettem taküm alitsü kokdima?" Pai tasüngdangbaji Tsüngrem nem meyiptsü, "Kibuba, Nai dang metet!" Meimchir tsütsü nungi tiaji tamakoktsü liasü.

Tanü arogoji tajungba masü. Idakji noksa lir saka ain mali. "Parnoki yimsü keta asenba mapa inyaksü, saka temeshiba kümdaktsüba ain parnoki magizüker" (2 Timo 3:5). Idakji tenüng ka lir saka taküm mali. Khrista Sardi nung aliba arogo arutsü. "Tenüng agi na taküm, saka na tasü lir" (J. Adok 3:1). Rongsen kar saka mangdang mali (J. Adok 3:17).

Idakji mapa (sentongtem) lir saka temeim mali (J. Adok 2:2-4). Renloksü melen idakji telemsa dang tali adoker. Sayutsüngir jagi ashir, "Aser ano ni anüng kübok O bendangdakji angu, idakjia tamajung liasü, aser temeshi alidakji temenen liasü" (Sayu 3:16). Vance Havneri tutettsür, "Asenok jangratemtsü ki kar, amentsü jangratemtsü car kar, jangratemtsü sermon angatsü jangratemtsü arogo kar. Khristai arütsüba indang asenoki kechi metet?"

Noksa yanglur ka dang telok ajunga mesatsüsa aser asentenshi nüngdak ta angatetdaksütsü teimla nung, süya aliba arogo ka noksa yanglutsü asüngdang. Noksa nungji akhüm taket tenla ki talang ka, jangratemtsü teperang sabang, aina agi tongpanger, sung kishi tulu aser tesangwa tulu tsükloka yanglur kishi tulu anasaji tenla enoktsüdak süngden tila ka tebang nungji sorak zü agi yangpanger yanglu. Au, arogo kobai missionary meyoker mesüra meyarir aji tasü arogo lir. Dr. Oswal J. Smithi (1889-1986) ashir, "Arogo kati sayutsüngi mesüra meranga akümtsü."

Saka Tsüngremi arogoji mesendok. Tasü süngkümi ibaji makoktsü (Mt. 16:18). Asenok shilem Ezekeili ama tashi angatsüba aser shintsüba (Ezek. 37)". Tashi agi, matitaki ayimtenang, Jangzü ama ne ola adokang, aser kü nübur dang parnok ozüng raksaba indang aser Yakob kidong dang parnok temenen indang metetdakjang" (Isa. 58:1). Idangji arogoi kong alitsüla item jagi meyipa arutsü. Ibai army tulu ama noktaksü, aser Khrista asoshi alimaji akoktsü (Ezk. 37:10). Alima tamajungtiba nung tajungtiba arogo nüngdaker.

apu. Pa apuba sülen tamasa Salisbury-i anir ao, iba sülen Baltimore-i anir ao aser tesüsa Louisiana-i anir oa detention facility nung ayu.

Pa apuba sülen hopta ka shi lir nisung jenti adenshia pa apuba anema longkak aita liasü. Iba dak alia GoFundMe campaign ka tenzüka pastor kibong yaritsü atema dollar sen 52,000 bendenteta liasü.

Amongnü pastor-i social media ajanga, pa tepuokdak aliba mapang nung pai nisung aika den Khrista osangtajung lemsatopogo, ta metetdaksü.

Social media nung video ka ajanga pastor-i, "Ni pua ayuba tesem nung Kibuba sentsüwangshi liasü. Hopta asem tashi sayutsüngitsü atema Tsüngremi kü nem kishi lapoktsü. Nisung aikati Khrista agizükogo. Adianutem, ibaji Kibuba Yisu Khrista nung takok anguba lir," ta metetdaksü.

Paisa pa meimertem dang, tepuokdak nisung aikati Khrista agizüka tanela kümzükbba atema asenoki pelatsüla, ta metetdaksü.

Pastor Espinal ya Honduras nungi lir. Pa US nung tesüba küm 24 tashi alidang pai ozüng alema inyakba ken o ka danga mali. Easton jila tesem ajaklen

pai sensakertem nem chiyungtsü, tejenokdak, süoshi aser senotsü teyari agütsür.

Sensak tia aser rara ajanga 2001 küm pastor Espinal-i Honduras toktsür US-i jena arua liasü. Honduras nung par kinüngertembo aika tepsetogo, ibayongji pai par kibong rangben kümzüksü atema US-i arua jenoka liasü.

Espinal indang visa 'expire' sür mapang talangka süiogo, ibayongji pai US nung alitsü atema temelaba tebushidak liasü.

Ano taküm May ita nung Florida nung apuba pastor, Maurilio Ambrocio-a June ita nung Guatemala-i yokogo. Pa densema New Orleans nungi Guatemala nunger nisung 100 shi charter tayimtsü ka ajanga meindok.

Taküm April ita nung National Association of Evangelicals aser U.S. Conference of Catholic Bishops' Department of Refugee & Migration Services densema US nung aliba Christian organizations aikati, US nung ozüng alema alir bendanger million 10 shi lir aser iba nungjagi shilem 80 shibo Khristanem lir, ta metetdakja liasü.

AO OSHI ANGAZÜKDAK:**TANÜ ANGAZÜKTSÜBA OJANG****Tesotet**

(adj) apetasong maket, taso shia litetba nisung (born leader)
* Taliba tesotet nisung ka liasü.

Tesü

(adj) tangar sülen, yakta aser tamalen masü, menuba (last one)
* Ozü medemertem rongnung ni tesü ki atong.



Tir Yimyim

OLONG PAITEP # 7245

1			2			3			4	
			5		6		7			
8										
			9							
	10									
								11		12
			13				14			
15						16				

TIPIEN

1. Anenzükdak ki - (5)
3. Asür mangyimba - (5)
5. Temulung nung shisadang - (5)
8. T ___ lu - (3)
10. Takdang temalen - (9)
11. Tesa ___ a - (3)
13. Ajungbena temulungjang
tongtonglatsü atu - (5)
15. Tejen lai nung tesayur - (5)
16. Tsüngsak-mopung - (5)

LANGTSÜNGLEN

1. Reprangdaksü - (4)
2. ___ ur - (3)
4. Kiojen yangludak - (6)
6. ___ ait - (7)
7. Nagaland nung ayong ka - (5)
9. Küm kasa purtem - (5)
10. Tetsüng tajemetdak - (6)
12. ___ adenshi - (4)
14. Tsünüsenbongtsü adokdak - (3)

OLONG PAITEP # 7244 TELANGZÜBA**TIPIEN :**

1. Kasa, 6. Rangben, 7. Mait,
9. Poktet, 11. Ati, 13. Atasa, 16. Rür,
17. Rajang, 20. Lanu, 24. Nüngjem,
25. Süra.

LANGTSÜNGLEN :

1. Khu, 2. Sükak, 3. Onük, 4. Oba, 5. Anü,
6. Ratet, 7. Mozü, 8. Ita, 10. Tar, 12. Tinu,
14. Salem, 15. Aja, 18. Anünü, 19. Taju,
21. Ano, 22. Onü, 23. Kua.

NAI-A YA METETTER MA**Tang tashi nung Cricket Asia Cup koker alirtem:**

ASIA CUP WINNER LIST	
YEAR	WINNER
1984	INDIA
1986	SRILANKA
1988	INDIA
1990	INDIA
1995	INDIA
1997	SRILANKA
2000	PAKISTAN
2004	SRILANKA
2008	SRILANKA
2010	INDIA
2012	PAKISTAN
2014	SRILANKA
2016	INDIA
2018	INDIA
2022	SRILANKA
2023	INDIA

Assam-Meghalaya arrtsü nung tensa mejungi aküm

Guwahati, Luroi/August 19 (Agencies): Hombarnü Assam-Meghalaya arrtsü nung Ri-Bhoi district kübok Maikhuli yimtsü nung mangatetep adoka liasü. Assam State Electricity Board (ASEB)-i temelaba magi Meghalaya litsü nung electric pole tem asongba yimdaklirtemi agintsüba sülen iba mangatetep ta adoka liasü.



Assam nungi telok ka arua yimdaklirtem den ken o ashishitepba sülen tensa tamajungba küma liasü. Telok ana tsünga o langtep tenzüker aser tamajungba küma aoba sülen teka sangshitep tenzüka liasü. Tenük kuli agütsürtemi ashiba agi, iba mangatetep nung tetsürtem ishika akoksa aser parnok rongnung kar dakbo teka sangshi aser nongtepba raratepba mapang parnok süoshi tem shisaja liasü.

Maikhuli nung alirtemi ashiba

agi, parnok electric pole tem ya anepdang agintsü, kechiyong item ya Meghalaya litsü nung asonger liasü. Pole tem agintsüba sülen parnok kidangi meyipa ao, saka arrtsü nung mangatetep aliba tesem nung Assam nungi nüburtemi arua parnok rongshiba sülen tensa mejungi küma liasü.

Mangatetep ya tamajungba küma aoba sülen Meghalaya aser Assam district ketdangsürtemi takaratiba nung jenjang agia liasü. State

anaprongla nungi ketdangsürtemi iba tesemi ilonga ao aser tensa tamajungba küma mao tsünga azüoka liasü.

Iba sülen district anaprongla nungi ketdangsürtemi, tensa azüoktsü aser arrtsü nung alirtem yimjung nung lidaktsütsü atema jenjang agitsü asoshi joint peace committee ka tentetsü telemtetba agia liasü. Iba committee yagi ken o bentetsü aser iba amala lendong ya mataloktsü atema jenjang agitsü.

Assam CM-i ozüing alema inyaksangshirtem amokmeren

Guwahati, Luroi/August 19 (Agencies): Assam Chief Minister Himanta Biswa Sarma-i, tanga state nungi arurtem ozüing alema inyaksangshiba maparen nung densema aliba ngutetra ketdangsürtemi aputsü ta tekümdangtsü metetdaksüogo.

Hombar aonung Gauhati Medical College and Hospital (GMCH) nung osangbenertem den sensaksemba mapang Sarma-i, Mumbai aser Kerala amala nungi mejangjaba nisungtem temulung malemtsüsa Assam-i arua lir ta ashi.

Chief Minister-i ashiba agi, iba amala nisungtem yagi National Register of Citizens (NRC) inyakyim nung minprongogo aser

tanga kasaji minprongtsü meranger. "Onoki parnok senzusenpong kanga junga meita atadar. NRC update asüba mapang ama masü tangbo onok kümküma lir. Karidanga ozüing alema inyaksangshira onoki idangjisa jenjang agitsü," ta pai ashi.

Paisa, "fundamentalist politics" magizükba lemsatepba den Kerala, Mumbai, mesüra Delhi amala nungi kija aser lokti tentet balalai lendong ataloktsü ana nung aliba ken o tem dak sendakba nung longkak aitba sorkari khenyongi magizüktsü, ta ashi.

Maneni pai, telok kar kümzüka ayuba aser telem dang

adokdaksütsü atema jenjang agiba atema item bendangertem ya aija liasü.

Kasa mapang nung CM-i, GMCH nung anogo pezü tain kinü tanur ka asüba indang jembiogo. Iba tanur ya Hombar anepdang Neonatal Intensive Care Unit (NICU) nung medical device ka indang wire tem nung aletseter lia angu.

Iba dak sendakba nung Saram-i, iba ya mapa shitak minyakyi züba züba toktsüba ajanga atalok ta ashiba den aibelenertem nguteta merenshitsü atema bushisüngdang committee ka tentettsüogo, ta shisem.

Manipur nung sen crore 12 alang temesepba mozü apu

Imphal, Luroi/August 19 (Agencies): Manipur nung Senapati district kübok security force temi Mongolbarnü international black market nung sen crore 12 alang temesepba mozü aser iba temesepba mozü shibelener ka puogo.

Itangitertem nungi osang tejangja angazüker inyaksangshiba mapang Assam Rifles, CRPF, aser Manipur Police team kati National Highway 102 nung temesepba

mozü bena aliba gari ka sota liasü.

Iba gari nung ya Moreh nungi temesepba mozü ya northern Senapati nung T. Khullen yimtsüngi bener oya liasü.

Aija alisang ya Thoubal district kübok Thoubal Moijing nung alir Md. Sajid Khan (35) ta jangjaogo.

ketdangsürtemi pa ket nungi World is Your (WY) tablets seret 3.5, Mahindra Bolero ka, mobile phone ka aser Aadhaar card ka

pua liasü.

Iba nisungba ket nungi apuba temesepba mozü ya international shishilembadak sen crore 12 shi asütsü ta amanger. Aija alisang den pai bena aliba temesepba mozü ya ken o dak sendakba aliba police station Officer-in-Charge nem bendanga agütsüogo aser ken o maneni bushisüngdangtsü.

Maneni ND & PS (Amendment) Act, 2023 dak ajemdaker ken o ka benokogo.

Venezuela Tir Nicolas Maduro-i sepai million aika shimtsü

Caracas, Luroi/August 19 (Agencies): Venezuela Tir Nicolas Maduro aputsü asoshi United States-i senpet sen timba kumtsüba aser Caribbean nung antidrug operation tasen tenzükba nung telangzüba agüja Maduro-i sepai million pezü dak tema shimtsü nangzükogo.

"Linük tesem ajunga ayimjemtsü asoshi militiamen 4.5 million dak tema aliba sentong temeja ka ni tan hopta tenzüksü," ta Maduro-i Hombarnü television ajanga jembidang ashi.

Venezuela indang militia ya taoba tir Hugo Chavez-i shim aser ketdangsür temi parnok züngsem ya million pongu shi lir ta shir, saka asadanger temibo kanga agi tajemba alitsü ta ashir. Venezuela nütsüng yongsük ya million 30 shi lir.

Washington-i alakyaia, t e s ü n g m a n g t s ü k a amokmerener, ta Maduro-i aitsü. Pa apur nem senpet anasü temloka sen \$50 million agütsütsü US Tir Donald Trump indang administration-i sangdongba sülen pai iba o ya ashi. Cartel de los Soles ta ajaba cocaine shibelenba network ka pai anir lir ta US-i tai tonglokJa lir.

Maduro-i tesüsaba election ana nung takok anguba US sorkari magizüker aser tawa ang pa indang administration aser cartel nem tenokdangba tasen agütsü. Ajisüaka US-i Maduro ya drug cartels den

sendaktepa aliba kuli kecha agüja mali.

Kasa mapang US mitkari Latin American drug cartels anema operation ulushiba nung shilem ka ama US guided-missile destroyers asem southern Caribbean len yoka lir.

USS Gravely, USS Jason Dunham aser USS Sampson ya anogo ishika tsüngta Venezuela tzükum tonga arutsü imlar, ta ketdangsür temi iba sentong rajema ashi.

Yangji sailors aser Marines 4,000 shi adentsü.

"Onokia Caribbean tesem ajunga nung, ozü tzüyim, ozü kimong-lumung, Venezuelan litsü-lika nung sepaitem yoka lir," ta Venezuelan Interior

Minister Diosdado Cabello-i ashi.

Maduro-i par political base dang mapa inyaker aser aluyimer militias tem timba kumdaktsütsü ajungshi aser linük temeden wazüka ayutsü asoshi parnok nem rifles aser missiles agütsütsü nangzük.

Tebilemstü jenti liaka Venezuela lenir-i US tangatetba anema ola adokba linüktem dang pelaba lemsatep aser Washington jembishinü ya shisaa orr anentsü ta ashi.

Maduro ya Mexico nung Sinaloa Cartel den sendaktepa lir ta US-i tai tongloksüba Mexico Tir Claudia Sheinbaum-i magizüker aser iba ama tesendaktep aliba kuli lar sorkar ket nung mali ta ashi.

Kim Jong Un-i nuclear tashi tekeraba nung ulushitsü nangzük

Seoul, Luroi/August 19 (Agencies): North Korea lenir Kim Jong Un-i par linük indang nuclear arsenal tekeraba nung ulushitsü amokmeren aser tang tagidak aliba United States-South Korea military exercise ya tebilemba tamajung nung lir ta ashi.

Kim-i iba o ya naval destroyer ka semdangba mapang ashi aser drills ya rara tenzüksü jangra aliba lemsateperba lir, ta Mongulbarnü sangdong ka ajanga ashi.

Paisa North Korea indang nuclear weapon sentong kanga kera ulushitsüla, kechiaser drills

nung "nuclear elements" lir ta ashi.

Küm shia agiba Ulchi Freedom Shield drills ya tan hopta tenzük, kong field maneuvers meyoktepa lir aser ibai North Korea indang nuclear tashi ainba nung telangzüba agütsür ta US aser South Korea ajanga ashir.

Iba exercises ya anogo 11 alitsü aser 40 field training events tesadang ka September nung alitsü sentong yanglushiogo.

Mapang atsüshiba ya ajanga Tir Lee Jae Myung-i tensa tajungba kumdaktsütsü merangba sayur, ta South

OJALA MENUNGRA BILEMTETER



Asür ojala *Nükmela Jamitsür* (Akhoya) 20/08/2024 tanü küm ka süitema aotang, nü sempet tajung tagutsünü, tejungnü, temeim aketba aser teti ajak asoshi aria bilemba mulungsentsü tajung nü mapa teti onok ten ali ama bilemteta sarasadema amonger.

Temeim: Chirnur, Semchir, Anük Apang aser Kinungertem

Korean ketdangsür temi ashir, ajisüaka Pyongyang-i telangzüba tajung magütsütsü ama aikati bilemer.

Seoul aser Washington nati iba exercises ya defensive atema dang lir ta ashir, saka teti Pyongyang-i item ya par linük amaktsü asoshi renemshir ta aitsür aser telangzüba agüja nok-nü sa tendanger.

Ita tatemlen Washington nung US Tir Donald Trump aser South Korea Tir Lee ajurutepdang North Korea onük ya jembitsü imlar, aser Pyongyang indang nuclear mangdang azüoktsü merangba indanga jembitsü.

Taoba küm Federation of American Scientists ajanga research ka adokba nung North Korea-i nuclear warheads 90 tashi atema fissile material peria yanglua alitsü ta ashir, ajisüaka shidakba benden nungbo 50 shi asütsü.

Nuclear mangdang den külemi Pyongyang ya naval capabilities nunga terenlokba lir. Parnoki taruba küm October ita tashinung 5,000-tonne Choe Hyon-class destroyer tasembuba renemtsü nükjidong lir aser item rong asoshi cruise aser anti-air missiles tem tendanger, ta Korean public broadcaster KCNA ajanga ashi.

Ukraine rara tembangtsü asoshi Trump-i Putin-Zelenskyy senden ayongner

Washington, Luroi/August 19 (Agencies): United States Tir Donald Trump-i Ukraine nung Moscow indang rara tembangdaktsütsü merangba nung tang tesüsa mera agiba nung Russia Tir Vladimir Putin aser Ukraine Tir Volodymyr Zelenskyy ajurutepa senden ka amentsü sentong sangdong.

Zelenskyy den France Tir Emmanuel Macron aser United Kingdom Ato Kilonser Keir Starmer densema European lenirtem den White House nung iba rara tembangtsü asoshi jembishinüa Hombarnü senden ka amenba mapang Trump-i iba sentong ya benok.

Trump-i Putin den phone ajanga jembiba sülen iba senden asoshi achayang tenzükogo ta ashi aser Russia aser Ukraine tir tem den külemi par asem senden amentsü ta ashi.

"Maneni küm pezü jungnüa rara aliba atema mera tekeraka lir, aser ibai tajung," ta Trump-i pa indang Truth Social sapang nung ashi.

"Vice President JD Vance, Secretary of State Marco

Rubio, aser Special Envoy Steve Witkoff nungeri Russia aser Ukraine den shisa lesateper."

German Chancellor Friedrich Merz aser NATO Secretary-General Mark Rutte natia sangdong balala nung Putin-i linük ana tsüngta senden amentsü mulunga lir ta jangjatsü, saka anogo mesüra tesem tejangja mashi.

Zelenskyy-ia Trump den senden amenba ya sensaksem kanga tajung liasü ta ashi aser Russia lenir den ajuruteptsü renema lir ta osangbener dang ashi.

Moscow-i senden ka amentsü mulunga lir ta mashi saka Russian aser Ukrainian delegations tsüngta maneni indang-indanga jembishinütsü junger ta Putin aser Trump na jembi ta presidential aide Yuri Ushakov-i ashi, ta Russia sorkar meyong TASS news agency ajanga ashi.

White House nung jembishinüba mapang Ukraine atema 'security guarantees' onük tongtipang sür jembiba mapang iba senden amentsü sentong ya benok, koba

Moscow-i amak tenzüker Putin aser Zelenskyy tsüngta senden mezüngbuba asütsü.

Ajisüaka item guarantees ya komala ka asüjar Hombarnü tashinung mejangjai lir.

US-i Ukraine dangi peacekeepers tem yoktsü asü ta asündang dang, "first line of defence" ji European linüktem asütsü saka Washington-ia teyari jenti agütsütsü, ta Trump-i langzü.

"Asenokia parnok yaritsü, asenoka adentsü," ta Trump-i ashi.

Mapang tatsüka lir Trump-i Truth Social nung, US den angatettepa European linüktemi koba security guarantees agütsütsü ta jembishinüa liasü, ta ashi.

Kyiv partners temi guarantees ya junga asadangtsü aser taruba hopta mesüra anogo 10 tsüngta renemtsü, ta Zelenskyy-i ashi.

Trump-i Ukraine nem NATO züngsem magütsütsü ta ashi, saka pa indang special envoy Witkoff-i züngsem 23 alliance indang collective defence mandate mesük security guarantees atemabo

Putin-i mulunga lir, ta Deobarnü ashi.

North Atlantic Treaty Organisation (NATO) indang Article 5 kübok NATO züngsem linük ka dak amakbaji alliance indang züngsem ajunga dak amakba ama züngshitsü ta shia lir.

Hombarnü senden amenba sülen Fox News den jembidang, Ukraine indang security guarantee nung Washington-i bendanga agütsür inyaktsü, saka koma shilem agitsüar ajibo asüngyanü jembitsü, ta Rutte-i ashi.

Jembishinüba mapang US mesüra European sepaitem yoktsü indang onük nungbo mekongshi, ta pai ashi.

"Iba rara ya tetem kati arura...teti asoshi asütsüla ta onok ajaki mulunga agizük," ta Rutte-i ashi.

White House nung senden amenba sülen yimjung tezüngzüktep nung Kyiv dang koba litsü agüjang ta ashitsüar mejangjar.

Senden mamendang, yimjung ken o jembiba nung Russia nungeri amokbanga aliba Crimea tzümeketli

Ukraine nem meyipa agütsütsü indangbo mejembitsü, ta Trump-i shia lir.

Rara tembangtsü asoshi tezüngzüktep ka agiba nung Russia aser Ukraine tsüngta litsü-lika melenteptsü akok, ta Trump tangatetba lir.

Ukraine indang litsü-lika shilem pongu lemsar shilem ka Russia kübok lir ta aikati asadangteta lir. Taoba küm Ukraine-i ajungbena meyiper amakba nung Russia indang Kursk region tuluka agi, saka tangbo par kübok Russia nunger litsü-lika mali südi ta amanger.

Fox News den jembidang, linük anapronglai atsüanem akatsü nüngdaker, ta US Secretary of State Marco Rubio-i ashi.

"Ibai temela masü aser tim masütsü südi, saka rara tatem kati arutsü asoshi yamaji inyaker. Aser rara ajak nung aji shidak," ta Rubio-i ashi.

Zelenskyy-i Moscow nem Ukraine nunger litsü magütsütsü ta shijen shia arur aser Hombarnüa Putin tena tsüngta ali ken o nung mangatettep alitsü südi ta ashi.

Alcaraz aser Swiatek nati Cincinnati Open kokogo



Luroi/August 19, 2025

(Agencies): Hombarnü Cincinnati Open tebur kija asaya final nung asaya tenzük minute 22 dang or aliba mapang world No.1 asayar Jannik Sinner temang mejungi akümba ajanga masayatetsüsa akümba sülen Carlos Alcaraz-i asaya koka liasü.

Mezüngbuba set nung 5-0 agi Alcaraz tejakdang sür asaya aliba mapang Sinner temang mejungi küma medical teyari agi aser mapang tatsüka dang lir asaya nungi anena liasü.

Asaya tema masayai tembangba ajanga fan tem tezü dangtepa liasü, saka Alcaraz asoshi takok mapang ka liasü shibai pa indang career nung title 22buba benogo aser Masters 1000 nung asaya 17buba atonga

kokogo.

Asaya tembangba sülen Sinner-i pa Deobarnü nungi temang mejungi aliba metetdaksü. Final atema mapang shitak nung taneptsü angutsü imla liasü saka mongotet, ajisüaka fan tem atema pa court-i ia liasü, ta ashi.

Iba asayamung tembangba sülen Italy nunger asayar ya US Open dak rangloker lir, koba Honibarnü tenzüktsü. "Tang US Open dak rangloker lir aser temang taneptsü angutsü kanga tongtibang lir," ta pai ashi.

Alcaraz taoba kümba iba asayamung nung kanga kara tsüka liasü saka takümbo tajungba asayateta takok nguogo. Iba asayamung akokba sülen Sinner tena tang tashi nung asaya 14 asayar aliba

nungi pai pongu aser Sinner-i tekuben kokogo.

Kasa asayamung tetsür kija asaya nung World No.2 Iga Swiatek-i Italy tsür Jasmine Paolini 7-5, 6-4 agi koka tang mezüngbuba Cincinnati Open kokogo.

Iba asayamung akokba sülen arishi küm 24 tain Poland tsürla yagi WTA 1000 11buba akokba dang masü lai rankings nunga No.1 asayar Aryna Sabalenka tera agi dang memenepi kümogo. Tena tsünga poing 500 dang tebendang lir.

Iba asayamung nung Swiatek-i set ka nung danga tamakok mongui asayaogo aser Serena Williams-i WTA 1000 titles 13 bener aliba meneptsü asoshi title ana dang nüngdaka kümogo.

Hockey Asia Cup nung Pakistan melen Banglades asayatsü

Luroi/August 19, 2025

(Agencies): Taruba Asia Cup asayatsü anogo teku dang anunga lia Pakistan team asayatsü masayatsü mejangjaba sülen parnok melen Bangladesh tebur hockey team

asayatsü renema lir. Iba asayamung ya taküm agi 12benbuba asayatsü lir, aser India nung tasembenbuba ayongzüka asayatsü renemdar.

India sorkari Pakistan nunger asayartem nem iba asayamung atema visa agütsütsü ta shiogo, saka Pakistan Hockey Federation-i security dak sendakba nung tebilemtsü lir ta shia India-i arutsü memulunger.

Asayamung ayongertemi team ti asayatsü aliba asayamung nung Pakistan melen asayatsü asoshi Bangladesh den tongtepratepogo, saka Hockey India-i ashiba agi ken o ya taruba anogo ana tsünga jangjatsü.

"Pakistan nunger asayartem nem visa agütsütsü mulunga lir ta India sorkari shiatokogo, saka parnoki India-i marunera aji onok tebilemtsü masü. Pakistan marura parnok melen asayatsü atema Bangladesh dang shiogo, saka ken o jangjatsü atema anogo ana atatsüsa akümtsü," ta Hockey India ketdangsür kati

PTI dang ashi.

"Pakistan aser Bangladesh napronglai tang tashi nung ken o jangjaja mali, saka Pakistan melen Bangladesh asayatsü imlar," ta ketdangsür yagisa shisem.

April ita kiralongrartemi Pahalgam amakba sülen linük ana tsünga mangatetep adokba ajanga Pakistan team Asia Cup nung asayatsü masayatsü mejangjai kümogo, koba taruba World Cup atema qualifying asayamung ka lir.

Pakistan Hockey Federation-i taoba mapang Asia Cup ya India nung masü saka tanga tesem ka nung asayatsü benokdang saka takok mongutet.

India den iba asayamung nung China, Japan, Malaysia, South Korea, Oman aser Chinese Taipei nunger asayatsü.

Pakistan-i Asia Cup ya asemben koka lir. Parnoki 1982, 1985 aser 1989 ta mezüngbuba Asia Cup asem atonga koka liasü. Parnok 1989, 2003 aser 2009 küm runners-up nung tembang.

2022 küm Jakarta nung iba asayamung asayaba mapang Pakistan team semifinals metongteti liasü, ajisüaka India den asayabo goal 1-1 agütsür tembang.

Asia Cup atema India squad sangdongogo



Luroi/August 19, 2025

(Agencies): BCCI-i Mongolbarnü Asia Cup atema asayar 15 agi kümtetba India squad sangdongogo. Team ya Suryakumar Yadav lenisüba nung asayatsü aser Shubman Gill vice captain asütsü shimogo.

Ajisüaka Yashasvi Jaiswal aser Shreyas Iyer nabo team nung züngoksema mali aser Jasprit Bumrah shiba tawa workload dak sendakba nung kanga sensaksema arudar, pa team nung züngoksemogo.

Asayartem shimba indang jembiba mapang chief selector Ajit Agarkar-i, "Yashasvi Jaiswal atema kanga tia maka saka Abhishek kanga junga asayadar aser pai ball-a onteter. Tena rongnung kabo meshimtsü liasü. Kasaji Shreyas-a meshim saka aji pa

tai masü," ta ashi.

Vice-captain asütsü Gill shimba indang jembidang Agarkar-i ashiba agi, "pai onoki imlaba dang nungi tajungba asayadar."

Asia Cup cricket tournament ya Dubai aser Abu Dhabi na nung September 9 nungi 28 tashi asayatsü. Taküm iba asayamung nung team ti T20I format nung asayatsü. Asian Cricket Council-i match venue tem ajak sangdongogo. Dubai nung asaya 11 asayatsü aser Abu Dhabi nung Afghanistan aser Hong Kong na mezüngbuba asaya densema asaya ti asayatsü.

Asayamung nung Afghanistan, Bangladesh, India, Pakistan, aser Sri Lanka ta full ACC züngsem pongu den UAE, Oman, aser Hong Kong ta team telok ana küma

lemsar asayatsü. Group A nung India, Pakistan, UAE, aser Oman lir aser Group B nung Sri Lanka, Bangladesh, Afghanistan, aser Hong Kong lir.

Iba asayamung indang official host ji India lir, saka iba asayamung ya neutral venue tem nung asayatsü. BCCI aser PCB na mulungtepba sülen iba jenjang agiogo.

Asayamung nung India team mezüngbuba UAE den September 10 nü Dubai nung asayatsü aser September 14 nü ajaki yonga aliba Pakistan den asaya asayatsü. Parnok tatemsa September 19 nü Abu Dhabi nung Oman den asayatsü.

Asayamung ya September 28 nü Dubai nung tembangtsü.

Asia Cup 2025 atema India squad:

Surya Kumar Yadav (C), Shubman Gill (VC), Abhishek Sharma, Tilak Varma, Hardik Pandya, Shivam Dube, Axar Patel, Jitesh Sharma (WK), Jasprit Bumrah, Arshdeep Singh, Varun Chakaravorthy, Kuldeep Yadav, Sanju Samson (WK), Harshit Rana, Rinku Singh.

WC qualifier atema Argentina team nung Messi züngoksemogo

Luroi/August 19, 2025

(Agencies): 2026 World Cup atema Venezuela aser Ecuador den South American qualifiers asayatsü asoshi Argentina national team nung asayar 31 shimba

Hombarnü sangdongogo. Iba team ya Lionel Messi-i anir asayatsü.

Captain Messi den squad nung Argentina nunger lanur asayar ishika aniokogo, kong Manchester City striker Claudio Echeverri, Porto midfielder Alan Varela, aser Real Madrid nungi asayar Franco Mastantuono nunger densema lir.

Coach Lionel Scaloni-i tang mezüngbuba Brazilian club Palmeiras nungi striker Jose Manuel Lopez team nung züngoksemogo.

Argentina team September 4 nü Buenos Aires kübok Monumental Stadium nung Venezuela den asayatsü aser anogo pongu lir Ecuador den Guayaquil nung asayatsü.

Argentina team World

Cup atema qualify süatokogo. Parnoki point 35 ngua parnok tanabuba jenjang nung aliba Ecuador aser tasembuba jenjang nung aliba Brazil team dang nungi point 10 agi timba lir.

Argentina squad

Goalkeepers: Emiliano Martinez, Walter Benitez, aser Geronimo Rulli

Defenders: Cristian Romero, Nicolas Otamendi, Nahuel Molina, Gonzalo Montiel, Leonardo Balerdi, Juan Foyth, Nicolas Tagliafico, Marcos Acuna, Julio Soler, aser Facundo Medina

Midfielders: Alexis Mac Allister, Exequiel Palacios, Alan Varela, Leandro Paredes, Thiago Almada, Nicolas Paz, Rodrigo De Paul, Giovanni Lo Celso, and Valentin Carboni

Forwards: Claudio Echeverri, Franco Mastantuono, Giuliano Simeone, Angel Correa, Julian Alvarez, Nicolas Gonzalez, Lionel Messi, Lautaro Martinez, aser Jose Manuel Lopez.

BILEMDANGANG

"Tangaria nai memetetba karbo meteta lir ta angatetang."